

四庫全書

集部

欽定四庫全書

集部

張司業集卷一至四

詳校官監察御史臣邱文愷

檢討臣何思鈞覆勘

總校官編修臣王燕緒

校對官主事臣陳文樞

謄錄監生臣葉中桂

欽定四庫全書

集部二

張司業集

別集類一唐

提要

臣等謹案張司業集八卷唐張籍撰籍字文昌和州人貞元十五年進士官至國子司業事蹟附載唐書韓愈傳中籍以樂府鳴一時其骨體實出王建上後人概稱張王未為篤論韓愈稱張籍學古淡軒鶴避難羣諒矣其

文惟文苑英華載與韓愈二書餘不概見相其筆力亦在李翱皇甫湜間視李觀歐陽詹之有意剗彫亦為勝之昌黎集有代籍上李湊東書稱以盲廢然集中祭退之詩稱公比欲為書遺約有脩章令我署其末以為後事程則愈末之時籍猶執筆作字知其目疾已愈世傳盲廢者非也其集為張洎所編洎集稱自丙午至乙丑相次綴輯得四百餘篇考

丙午為南唐李昇昇元元年當晉開運三年
乙丑為宋乾德二年蓋洎搜葺二十年始成
完本亦云勤矣陳振孫書錄解題云張洎所
編籍詩名木鐸集凡十二卷近世湯中李庸
以諸本校定為張司業集八卷刻之平江此
本為明萬厯中和州張尚儒與張孝祥平湖
集合刻者尚儒稱購得河中劉侍郎本又叅
以朱蘭岫太史金陵刊本得詩四百四十九

首并錄與韓昌黎書二首訂為八卷則已非
張洎湯中之舊然其數不甚相遠似乎無所
散佚也乾隆四十六年十二月恭校上

總纂官

臣紀昀臣陸錫熊臣孫士毅

總校官 臣陸費墀

欽定四庫全書

張司業集卷一

唐 張籍 撰

五言古詩

野居

貧賤易為適荒郊有安居端坐無餘思彌樂古人書秋
田多良苗野水多遊魚我無事與網安得充廩厨寒天
白日短簷下煖賤軀四肢漸寬柔中腸鬱不舒多病減

志氣為客足憂虞況復時節晚覽景獨踟躕

西州

羌胡據西州近甸無邊城山東收稅租養我防塞兵胡
騎來無時居人常震驚嗟我五陵間農者罷耘耕邊頭
多殺傷士卒難全形郡縣發丁役丈夫各征行生男不
能養懼身有姓名良馬不戀秣烈士不苟營所願除國
難再逢天下平

雜怨

切切重切切秋風桂枝折人當少年嫁我當少年別念
君昨征行年年役長途妾身甘獨歿高堂有舅姑山川
豈遙遠行人自不返

三原李氏園宴集

暮春天早熟邑居苦囂煩言從君子樂樂彼李氏園園
中有草堂池引涇水泉開戶西北望遠見嵯峨山借問
主人翁北州佐戎軒僕夫守舊宅為客侍華筵高懷有
餘興竹樹芳且鮮傾我所持觴盡日共留連疎拙不偶

俗常喜形體閒況來幽棲地能不重笑言

湖南曲

瀟湘多別離風起芙蓉洲江上人已遠夕陽滿中流
鴛鴦東南飛飛上青山頭

春水曲

鴨鴨背啞啞青蒲生春水狹蕩漾木蘭船中有雙少年
少年醉鴨不起

懷別

僕人驅行軒低昂出我門離堂無留客席上唯琴樽古
道隨水曲悠悠繞荒村遠程未奄息別念在朝昏端居
愁歲永獨此留輕景豈無經過人尋嘆門巷靜君如天
上雨我如屋下井無因同波流願作形與影

離婦

十載來夫家閨門無瑕疵薄命不生子古制有分離託
身言同穴今日事乖違念君終棄捐誰能強在茲堂上
謝姑嫜長跪請離辭姑嫜見我往將決復沉疑與我古

時釗留我嫁時衣高堂拊我身哭我於路陲昔日初為
婦當君貧賤時晝夜常紡績不得事蛾眉辛勤積黃金
濟君寒與饑洛陽買大宅邯鄲買侍兒夫壻乘龍馬出
入有光儀將為富家婦永為子孫資誰謂出君門一身
上車歸有子未必榮無子坐生悲為人莫作女作女實
難為

憶遠曲

水上山沉沉征途復繞林途荒人行少馬迹猶可尋雪

中獨立樹海口失侶禽離憂如長綫千里縈我心

宛轉行

華屋重翠幄綺席雕象牀
速漏微更疎薄衾中夜涼
鑪氣暗徘徊寒鐙背斜光
妍姿結宵態寢辟幽夢長
宛轉復宛轉憶君更未央

新桃

桃生何婆婆枝葉四面多
高未出牆顛蒿覓相凌摩植
之三年餘今年初試花秋來
未成實其陰良已嘉青蟬

不來鳴安得迅羽過常恐牽絲虫蒙羃成網羅顧託戲
童兒勿折我柔柯明年結甘實磊磊克汝家

惜花

庭樹花蒙蒙墜地無顏色日暮東風起飄揚玉堦側殘
蕊在猶稀青條聳復直為君結芳實令君勿嘆息

董公

誰主東諸侯元臣隴西公旌節居汴水四方皆承風在
朝四十年天下誦其功相我明天子政成如太宗東方

有艱難公乃出臨戎單車入危城慈惠安羣衆公謂其
黨言汝材甚驍雄為我帳下士出入衛我躬汝息為我
子汝親我為翁衆皆相顧泣無不和且恭其父教子義
其妻勉夫忠不自以為資奉上但顒顒公衣無文采公
食少肥醲所憂在萬人人實我寧空輕刑寬其政薄賦
施租庸四郡三十城不知歲饑凶天子臨朝喜元老置
在東今聞揚盛德就安我大邦百辟賀明主皇風恩賜
重朝廷有大事就決其所從海內既無虞君臣方肅雍

端居任僚屬宴語常從容翩翩者蒼烏來朝於林叢甘
瓜生場圃一蒂實連中田隴有嘉穀異畝蕙亦同賢人
佐聖人德與神明通感應我淳化生瑞我地中昔者此
州人但矜馬與弓今公施德禮自然威武崇公與其百
年受祿將無窮

學仙

樓觀開朱門木樹連房廊中有學仙人少年休穀糧高
冠如芙蓉霞月被衣裳六時朝上清佩玉紛鏘鏘自言

天老書秘覆雲錦囊百年度一人妄泄有災殃每占有
仙相然後傳此方先生坐中堂弟子跪四廂金刀截身
髮結誓焚靈香弟子得其訣清齋入空房守神保元氣
動息隨天罡爐燒丹砂盡晝夜候火光藥成既服食計
日乘鸞鳳虛空無靈應終歲安所望勤勞不能成疑慮
積心腸虛羸生疾疹壽命多天傷身歿懼人見夜埋山
谷傍求道慕靈異不如守尋常先王知其非戒之在國
章

沈千運舊居

汝北君子宅我來見頽墉亂離子孫盡地屬隣里翁土
木被兵墟蹊路不相通舊井漫草合牛羊墜其中君辭
天子書放意任體躬一生不自力家與逆旅同高議切
星辰餘聲激瘖聾方將旌舊閭百歲可封崇嗟其未積
年已為荒林叢時豈無知音莫能敦此風浩蕩竟無覩
我將安所從

懷友

人生有行役誰能如草木別離感中懷乃我為桎梏百
年受命短光景良不足念我別離者願懷日月促平地
施道路車馬往不復空知為良田秋望禾黍熟端居無
儔侶日夜禱耳目立身難自覺常恐憂與辱窮賤無閒
暇疾疹多嗜慾我思攜手人逍遙任心腹

寄韓愈

野館非我室新居未能安讀書避塵雜方覺此地閒過
郭多園墟桑果相接連獨游竟寂寞如寄空雲山夏景

常晝寐密林無鳴蟬臨溪一盥濯清去肢體煩出林望
曾城君子在其間戎府草章記阻我此游盤憶昔西潭
時並持釣魚竿共忻得魴鯉烹鱠于我前幾朝還復來
嘆息時獨言

別段生

與子骨肉親願共長相隨况離父母傍從我學書詩同
在道路中講誦亦未窺為文于我前日夕生光儀行役
多疾疹賴此相扶持貧賤事俱難今日有別離我去秦

城中子留汴水湄離情兩飄斷豈異風中絲幼年獨為
客舉動難為宜努力自修勵長如見我時我時登山岡
再揖問還期還期在新年勿怨歡會遲

贈姚怱

漏天日無光澤土松不長君今職下位志氣安得揚束
髮文思壯才為國賢良無人識高韻薦于天子傍况我
愚村姿強趨利名場遠行干貴人身舉固難彰昔逢汴
水濱今會習池陽豈無再來期顧恐非此方願為石中

泉不為瓦上霜離別勿復道所貴不相忘

傷子鵠

西山無逸人忽覺大國貧良玉沉幽泉名為天下珍野
性疎時俗再命乃從君氣高終不合去如鏡上塵我初
為章句相合者有君今來吊嗣子對壠燒斯文耕者廢
其耜蠶者絕其薪筭無新衣裳曷用光我身莫回徒再
拜昔意安能陳遺存金石韻千載人所聞

獻從兄

悠悠旱天雲不遠如飛塵賢達失其所沉飄同衆人擢
秀登王畿出為良使賓名高滿朝野幼賤誰不聞一朝
遇讒邪流竄八九春詔書近遷移組綬未及身冬井無
寒水玉潤難為焚虛懷日迢遙榮辱常保純我念出游
時每吟康樂文願言靈溪期聊欲相依因

南歸

促促念道路四支不常寧行車未及家天外非盡程骨
肉望我歡鄉里望我榮豈知東與西憔悴竟無成天寒

苦夜長窮者不念明惟離其寢牀百憂傷性靈世道多
險薄相勸莫忠誠遠游無知音不知商賈行達人有常
志愚夫勞無營舊山幸未賣言歸樂此生

卧疾

身病始知道卧讀神農經空房夜留燈四壁青熒熒羈
旅逐人歡貧賤還自輕今來問良醫乃知病所生僮僕
各相憂杵臼無停聲見我形憔悴勸藥語丁寧春雨枕
席冷窓前新禽鳴開門起無力遙愛鷄犬行服藥察耳

目漸覺如酒醒方悟養生者不為憂患并

贈孟郊

歷歷天上星沉沉水中萍幸當清秋夜流影及微形君
生哀俗間立身如禮經淳意發高文獨有金石聲才名
振京國歸省東南行停車楚城下顧我不念程寶鏡曾
墮水不磨難自明苦節居貧賤所知賴友生歡會方別
離戚戚憂慮并安得在一方終老無送迎

城南

漾漾南澗水來作曲池流言尋參差島曉榜輕盈舟萬
繞不再止千尋盡孤幽藻蒞訝人重萍分指魚遊繁苗
毯下垂密箭翻迴輶曝鼈亂自墜陰藤斜相鈎卧蔭黑
米吐翻芰紫角稠橋低競俯僂亭近間夷猶目為逐勝
朗手因掇芳柔漸喜游來極忽疑歸無由氣狀雖可覽
纖微諒難搜未聽主人賞徒愛清華秋

夜懷

窮居積遠念轉轉迷所歸幽蕙零落色暗螢參差飛病

生秋風簾淚墮明月衣無愁坐寂寞重使奏清徽

奉和舍人叔直省時思琴

藹藹紫微直秋意深無窮滴瀝先閣漏蕭穆禁池風竹
月泛涼影萱露澹幽叢地清物態勝宵閒琴思通時屬
雅音際迥凝虛抱中達人掌樞近亦與隱默同

野寺後池寄友

佛寺連野水池幽夏景清繁木蔭芙蓉集時有水禽鳴通
溪岸塹斷分渚流復縈唄僧鍾磬罷月來池上明友人

竟不至東北見高城獨游自寂寞況此恨盈盈

寄別

寒天正飛雪行人心切切為同萬里客中路忽離別別
君汾水東望君汾水西積雪無平岡空山無人蹊羸馬
時倚轅行行未遑食下車勸童僕相顧莫歎息詎知佳
期隔離念終無極

病中寄白學士拾遺

秋亭病客眠庭樹滿枝蟬涼風繞砌起斜影入牀前梨

晚漸紅墮菊寒無黃鮮倦游寂寞日感嘆蹉跎年塵歡
久消委華念獨迎延自寓城闕下識君弟事焉君為天
子識我方沉病纏無因會同語悄悄中懷煎

雨中寄元宗簡

秋堂羸病起盥漱風雨朝竹影冷疎澁榆葉暗飄蕭街
徑多墜果牆隅有蛺蝶延瞻游步阻獨坐閒思饒君居
應如此恨言相去遙

惜花

春潭足芳樹水清不如素幽人愛華景一一空山暮月
出潭氣白游魚暗衝石夜深春思多酒醒山寂寂

祭退之

嗚呼吏部公其道誠巍昂生為大賢姿天使光我唐德
義動鬼神鑒用不可詳獨得雄直氣發為古文章學無
不該貫吏治得其方三次論諍退其志亦剛強再使平
山東不言所謀臧薦待皆寒羸但取其才良親朋有孤
稚昏姻有辦營如彼天有斗人可為信常如彼歲有春

物宜得華昌哀哉未申施中年遽殂喪朝野良共哀矜
於知舊腸籍在江湖間獨以道自將學詩為衆體又乃
溢笈囊畧無相知人黯如霧中行北遊偶逢公盛語相
稱明名因天下聞傳者入歌聲公領試士司首薦到上
京一來遂登科不見苦貢場觀我性朴直乃言及平生
仁慈類朋黨骨肉無以當坐令其子拜常呼幼時名追
招不隔日斷踐公之堂出則連轡馳寢則對榻牀搜窮
古今書事事相酌量有花必同尋有月必同望為文先

見草釀熟偕共觴新果及異鮭無不相待嘗到今三十年曾不少異更公文為時帥我亦有微聲而後之學者或號為韓張我官麟臺中公為大司成念此委末秩不能力自揚特狀為博士始獲升朝行未幾享其資遂忝南宮郎是事賴拯扶如屋有棟梁去夏公請告養病城南莊籍時官休罷兩月同游翔黃子陂岸曲地曠氣色清新池四平漲中有蒲荇香北臺臨稻疇茂柳多陰涼板亭坐垂釣煩苦稍已平共愛池上佳聯句舒遐情偶

有賈秀才來茲亦間并移船入南溪東西縱篙根劃波
激船舷前後飛鷗鷺回入潭瀨下網截鯉與魴踏沙掇
水疏樹下蒸新杭日來相與嬉不知暑日長柴翁攜童
兒聚觀於岸傍月中登高灘星漢交垂芒釣車擲長綫
有獲齊歡驚夜闌乘馬歸衣上草露光公為游谿詩唱
咏多慨慷自期此可老結社於其鄉籍受新官詔拜恩
當入城公因同歸還居處隔一坊中秋十六夜魄圓天
差晴公既相邀留坐語於堦楹乃出二侍女合彈琵琶

筆臨風聽繁絲忽遽聞再更顧我數來過是夜涼難忘
公疾浸日加孺人視藥湯來候不得宿出門每迴遑自
是將重危車馬候縱橫門僕皆逆遣獨我到寢房公有
曠達識生死為一網及當臨終辰意色亦不荒贈我珍
重言傲然委衾裳公比欲為書遺約有修章令我署其
末以為後事程家人號于前其書不果成子符奉其言
甚於親使令魯論未訖註手跡今微茫新亭成未登閑
在莊西廂書劄與詩文重疊我筭盈頃息萬事盡腸情

多摧傷舊塋明津北野定動鼓鉦柳車一出門終天無
迴箱籍貧無贈貲蜀用申哀誠衣器陳下帳醪餌奠堂隍
明靈庶鑒知髣髴斯來饗

張司業集卷一

欽定四庫全書

張司業集卷二

唐 張籍 撰

七言古詩

春日行

春日融融池上暖
竹芽出土蘭心短
草堂晨起酒半醒
家僮報我園花滿
頭上皮冠未曾整
直入花間不尋徑
樹樹殷勤盡遶行
攀枝未徧春日暝
不用積金著青天

不用服藥求神仙但願園裏花長好一生飲酒花前老
寄遠曲

美人來去春江暖江頭無人湘水滿浣紗石上水禽栖
江南路長春日短蘭舟桂楫常渡江無因重寄雙瓊瑤

短歌行

青天蕩蕩高且虛上有白日無根株流光暫出還入地
使我年少不須臾與君相逢勿寂寞衰老不復如今樂
金卮盛酒置君前再拜願君千萬年

行路難

湘東行人長嘆息十年離家歸未得
弊裘羸馬苦難行
僮僕饑寒少筋力君不見牀頭黃金盡
壯士無顏色
龍璫泥中未有雲不能生彼升天翼

征婦怨

九月匈奴殺邊將漢軍全沒遼水上
萬里無人收白骨
家家城下招魂葬婦人依倚子與夫
同居貧賤心亦舒
夫死戰場子在腹妾身雖存如畫燭

白紵歌

皎皎白紵白且鮮將作春衣稱少年裁縫長短不能定
自持刀尺向姑前復恐蘭膏汗纖指常遣傍人收墮珥
衣裳著時寒食下還把白鞭鞭白馬

野老歌

老翁家貧在山住耕種山田三四畝苗疏稅多不得食
輸入官倉化為土歲暮鋤犁倚空室呼兒登山收橡實
西江賈客珠百斛船中養犬長食肉

寄衣曲

織素裁衣獨苦辛，遠因回使寄征人。
官家亦自寄衣去，貴從妾手著君身。
高堂姑老無侍子，不得自到邊城裏。
慙慙為看初著時，征夫身上宜不宜。

送遠曲

戲馬臺南山簇簇，山邊飲酒歌別曲。
行人醉後起登車，席上回尊勸僮僕。
青天漫漫覆長路，遠遊無家安得住。
願君到處自題名，他日知君從此去。

築城詞

築城處千人萬人齊把杵重重土堅試行錐軍吏執鞭
催作遲來時一年深磧裏盡著短衣渴無水力盡不得
拋杵聲杵聲未定人皆死家家養男當門戶今日作君
城下土

猛虎行

南山北山樹冥冥猛虎白日繞林行向晚一身當道食
山中麋鹿盡無聲年年養子在空谷雌雄上山不相逐

谷中近窟有山林長向村家取黃犢五陵年少不敢射
空來林下看行迹

別離曲

行人結束出門去幾時更踏門前路憶昔君初納采時
不言身屬遼陽戍早知今日當別離成君家計良為誰
男兒生身自有役那得誤我少年時不如逐軍征戰死
誰能獨老空閨裏

牧童詞

達牧牛遶村四面禾黍稠陂中饑鳥啄牛背今我不得
戲隴頭入陂草多牛散行白犢時向蘆中鳴隔堤吹葉
應同伴還穀長鞭三四聲牛羊食草莫相觸官家截爾
頭上角

沙堤行呈裴相公

長安大道沙為堤早風無塵晚無泥宮中玉漏下三刻
朱衣導騎丞相至路傍高樓息歌吹千車不行行者避
街官閭吏相傳呼當前十里惟空衢白麻詔下移相印

新堤未成舊堤盡

求仙行

漢皇欲作飛仙子年年採藥東海裏蓬萊無路海無邊
方士舟中相枕死招搖在天因白日甘泉玉樹無仙實
九皇真人終不下空向離宮祠太乙丹田有氣凝素華
君能保之昇絳霞

古釵嘆

古釵墮井無顏色百尺泥中今復得鳳凰宛轉有古儀

欲為首飾不稱時女伴傳看不知主羅袖拂拭生光輝
蘭膏已盡股半折雕文刻樣無年月雖離井底入匣中
不用還與墜時同

各東西

遊人別一東復一西出門相背兩不返惟信車輪與馬
蹄道路悠悠不知處山高海闊誰辛苦遠遊不定難寄
書日日空尋別時語浮雲上天雨墮地暫時會合終離
異我今與子非一身安得死生不相棄

節婦吟

君知妾有夫贈妾雙明珠感君纏綿意繫在紅羅襦妾
家高樓連苑起良人執戟明光裏知君用心如日月事
夫誓擬同生死還君明珠雙淚垂何不相逢未嫁時

永嘉行

黃頭鮮卑入洛陽胡兒持戟升明堂晉家天子作降虜
公卿奔走如牛羊紫陌旌旗暗相觸家家鷄犬驚上屋
婦人出門隨亂兵夫死眼前不敢哭九州諸侯驚曠土

無人領兵來顧主北人避胡皆在南南人至今能晉語

採蓮曲

秋江岸邊蓮子多採蓮女兒凭船歌青房圓實齊戢戢
爭前競折漾微波試索綠莖不尋藕斷處絲多刺傷手
白練束腰袖半捲不插玉釵妝梳淺船中未滿度前洲
借問阿誰家住遠歸時共待暮湖上自美芙蓉還蕩漿

傷歌行

黃門詔下促收捕京兆尹繫御史府出門無復部曲隨

親戚相逢不容語辭成謫尉南海州受命不得須臾留
身著青衫騎惡馬東門之外無送者郵夫防吏急喧嘩
往往驚墮馬蹄下長安里中荒大宅東門已除十二戟
高堂舞榭鏤管絃美人遙望西南天

北邙行

洛陽北門北邙道喪車鱗鱗入秋草車前齊唱薤露歌
高墳新起日我我朝朝暮暮人送葬洛陽城中人更多
千金立碑高百尺終作誰家柱下石山頭松栢半無主

地下白骨多於土寒食家家送紙錢烏鳶作窠銜上樹
人居朝市未解愁請君暫向北邙遊

吳宮怨

吳宮四面秋江水江清露白芙蓉死吳王醉後欲更衣
座上美人嬌不起宮中千門復萬戶君恩反覆誰能數
君心與妾既不同徒向君前作歌舞茱萸滿宮紅實垂
秋風嫋嫋生繁枝姑蘇臺上夕燕罷他人侍寢還獨歸
白日在天光在地君今那得長相棄

關山月

秋月朗朗關山上
山中人馬蹄響關山
秋來雨雪多
行人見月唱邊歌
海邊漠漠天氣白
胡兒夜度黃龍磧
軍中探騎暮出城
伏兵暗處低旌戟
漢水連天霜草平
野駝尋水磧中鳴
隴頭風急鴈不下
沙場苦戰多流星
可憐萬國關山道
年年戰骨多秋草

少年行

少年從獵出長楊
禁中新拜羽林郎
獨到輦前射雙虎

君王手賜黃金璫，日日閨雞都市裏。
贏得寶刀重刻字，百里報讐夜出城。
天明還在娼樓醉，遙聞虜到平陵下。
不待詔書行上馬，斬得名王獻桂宮。
封侯起第一日中，不為六郡良家子。
百戰始取邊城功。

白頭吟

請君膝上琴，彈我白頭吟。
憶昔君前嬌笑語，兩情宛轉如縈素。
宮中為我起高樓，更開花池種芳樹。
春天百草秋始衰，棄我不得白頭時。
羅襦玉珥色未暗，今朝已道

不相宜揚州青銅作明鏡暗中持照不見影人心迴互
自無窮眼前好惡那能定君恩已去若再返菖蒲花開
月長滿

將軍行

彈箏峽東有胡塵天子擇日拜將軍蓬萊殿前賜六纛
還領禁兵為部曲當朝受詔不辭家夜向咸陽原上宿
戰車彭彭旌旗動三十六軍齊上隴隴頭戰勝夜亦行
分兵處處收舊城胡兒殺盡陰磧暮擾擾唯有牛羊聲

邊人親戚曾戰沒今逐官軍收舊骨殖西行見萬里空
幕府獨奏將軍功

賈客樂

金陵向西賈客多船中生長樂風波欲發移船近江口
船頭祭神各澆酒停杯共說遠行期入蜀經蠻難別離
金多衆中為上客夜夜篝眠獨遲秋江初月猩猩語
孤帆夜發瀟湘渚水工持櫂防暗灘直過山邊及前侶
年年逐利西復東姓名不在縣籍中農夫稅多長辛苦

棄業長為販寶翁

羈旅行

遠客出門行路難
停車飲策在門端
荒城無人霜滿野
野火燒橋不得度
寒虫入窟鳥歸巢
僮僕問我誰家去
行尋野徑心未息
雙轂長行礙荆棘
緣岡入澗投田家
主人舂米為夜食
晨雞喔喔茆屋傍
行人起掃車上霜
舊山已別行已遠
身計未成難復返
長安陌上相識稀
遙望天門白日晚
誰能聽我辛苦行
為向君前歌一聲

車遥遥

征人遥遥出古城雙輪齊動駟馬鳴山川無處無歸路
念君長作萬里行野田人稀秋草綠日暮放馬車中宿
驚麕游兔在我傍獨唱鄉歌對童僕君家大宅鳳城隅
年年道上隨行車願為玉鑿繫華軾終日有聲在君側
門前舊宅久已拋無繇復得君消息

妾薄命

薄命婦良家子無事從軍去萬里漢家天子平四夷護

羗都尉裹屍歸念君此行為死別對君裁縫泉下衣與
君一日為夫婦千年萬歲亦相守君愛龍城征戰功妾
願青樓歌樂同人生各各有所欲詎得將心入君腹

朱鷺曲

翩翩兮朱鷺來汎春塘栖綠樹羽毛如剪色如染遠飛
欲下雙翅歛避人引子入深塹動處水紋開灩灩誰知
豪家網爾軀不如飲啄江海隅

楚宮行

章華宮中九月時桂花未落紅橘垂江頭騎火照輦道
君王夜從雲夢歸霓旌鳳蓋到雙闕臺上重重歌吹發
千門萬戶開相當燭籠左右列成行下輦更衣入洞房
洞房侍女盡焚香玉階羅幙微有霜齊言此夕樂未央
玉酒湛湛盈華觴絲竹次第鳴中堂巴姬起舞向君王
迴身垂手結明璫願君千年萬年壽朝出射麋夜飲酒

江南曲

江南人多種橘樹吳姬舟上織白苧土地卑濕饒虫蛇

連木為牌入江住江村亥日長為市落帆度橋來浦裏
青莎覆城竹為屋無井家家飲潮水長干日日沽春酒
高高酒旗懸江口娼樓兩岸懸水柵夜唱竹枝留北客
江南風土歡樂多悠悠處處盡經過

烏啼引

秦烏啼啞啞夜啼長安吏人家吏人得罪囚在獄傾家
賣產將自贖少婦起聽夜啼烏知是官家有赦書下牀
心喜不重寐未明上堂賀舅姑少婦語啼烏汝啼慎勿

去借汝庭樹作高巢年年不令傷爾雛

讌客詞

上客不用顧金羈主人有酒君莫違請君看取園中花
地上漸多枝上稀山頭樹影不見石溪水無風應更碧
人人齊醉起舞時誰覺翻衣與倒幘明朝花盡人已去
此地獨來空繞樹

促促詞

促促復促促家貧夫婦慳不足今年為人送租船去年

捕魚在江邊家中姑老子復小自織吳綃輸稅錢家家
桑麻滿地黑念君一身空努力願教牛蹄團團羊角直
君身常在應不得

烏栖曲

西山作宮潮滿池宮烏曉鳴芙蓉枝吳姬自唱採蓮曲
君王昨夜舟中宿

隴頭行

隴頭路斷人不行胡騎夜入涼州城漢家處處格鬪死

一朝盡沒隴西地驅我邊人胡中去散放牛羊食禾黍
去年中國養子孫今來異域通言語誰能更使李輕車
收取涼州入漢家

塞上曲

邊州八月修城堡候騎先燒磧中草胡風吹沙度隴飛
隴頭林木無北枝將軍閱兵青塞下鳴鼓逢逢促獵圍
天寒山頭石斷裂白日不銷帳上雪烏孫國亂多降胡
詔使名王持漢節年年征戰不得閒邊人殺盡唯空山

董逃行

洛陽城頭火幢幢亂兵燒我天子宫宮城南面有深山
盡將老幼藏其間重岩為屋橡為食丁男夜行候消息
聞道官軍猶掠人舊里如今歸未得董逃行漢家幾時
重太平

白鼉鳴

天欲雨有東風南谿白鼉鳴窟中六月人家井無水夜
聞白鼉人盡起

洛陽行

洛陽宮闕當中州城上
幾我十二樓翠華西去幾時返
巢巢乳鳥藏蟄鷺御門空鎖五十年
稅彼農夫修玉殿
六街朝暮鼓鼙鼙禁兵持戟守空宮
百官日月謝拜表
驛使相續長安道上陽宮樹黃復綠
野豺入苑食麋鹿
陌上老翁空淚垂共說武皇巡幸時

湘江曲

湘江無潮秋水濶湘中月落行人發
行人發送人歸白

蘋茫茫鷓鴣飛

雀飛多

雀飛多觸網羅網羅高樹巔汝飛蓬蒿下勿復投身網
羅間粟積倉禾在田巢之雛望其母來還

春江曲

春江無水潮水平滿江嘯嘯鳬雛鳴長干夫婿愛遠行
自染春衣縫已成妾身生長金陵側去年隨夫住江北
春來未到父母家舟小風多渡不得欲辭舅姑先問人

私向江頭祭水神

遠別離

蓮葉團團荇葉折長江鯉魚鱗鱗赤念君少年棄親戚
千里萬里獨為客誰言遠別心不易天星墮地能為石
幾時斷得城南陌勿使居人有行役

秋夜長

秋天如水夜未央天漢東西月色光愁人不寐畏枕席
暗蛩唧唧遠我傍荒城為村無更聲起看北斗天未明

白露滿田風裊裊千聲萬聲鷓鴣鳥鳴

山頭鹿

山頭鹿角斐斐尾促促貧兒多租輸不足夫死未葬兒
在獄早日熬熬蒸野岡禾黍不收無獄糧縣家唯憂少
軍食誰能令爾無死傷

江村行

南塘水深蘆笋齊下田種稻不作畦耕場磷磷在水底
短衣半染蘆中泥田頭刈莎結為屋歸來繫牛還獨宿

水淹手足盡為瘡
山虫遶衣飛撲撲
桑村椹黑蠶再眠
小姑採桑不餉田
江南熱早天氣毒
雨中移秧顏色鮮
一年耕種長苦辛
田熟家家將賽神

樵客吟

山上採樵選枯樹
深處樵多出辛苦
秋來野火燒櫟林
枝柯已枯堪採取
斧聲坎坎在幽谷
採得齊稍青葛束
日西待伴同下山
竹擔彎彎向身曲
共知路傍多虎穴
未出深林不敢歇
村西地暗狐兔行
稚子叫時相應聲

採樵客莫樵松與栢松栢生枝直且堅與君作屋成家
室

泗水行

泗水流急石纂纂鯉魚上下紅尾短春水消散白雪滿
行舟往來浮橋斷城邊漁市人早行水烟漠漠多棹聲
雲童行

雲童童白龍之尾垂江中今年天旱不作雨水足牆上
有禾黍

長塘湖

長塘湖一斛水中半斛魚大魚如柳葉小魚如針鋒水
濁誰能辯真龍

廢宅行

胡馬崩騰滿阡陌都人避亂唯空宅宅邊青桑垂宛宛
野蠶食葉還成繭黃雀銜草入燕窠嘖嘖啾啾白日晚
去時禾黍埋地中饑兵掘土翻重重鴟梟養子庭樹上
曲牆空屋多旋風亂定幾人還本土唯有官家重作主

寄菖蒲

石上生菖蒲一寸十二節仙人勸我食令我頭青面如
雪逢人寄君一絳囊書中不得傳此方君能來作棲霞
侶與君同入丹玄鄉

送遠曲

舟行

吳門向西流水長水長柳暗烟茫茫行人送客各惆悵
話離叙別傾清觴吟絲竹鳴笙簧酒酣性逸歌猖狂行
人告我挂帆去此去何時返故鄉殷勤振衣兩相囑世

事近來還淺促願君看取吳門山帶雪經春依舊綠行
人行處求知親送君去去徒酸辛

楚妃怨

湘雲初起江沉沉君王遙在雲夢林江南雨多旌戟暗
臺下朝朝春水深章華殿前朝下國君心獨樂終無極
楚兵滿地能逐禽誰用一身騁筋力西江若翻雲夢中
麋鹿死盡應還宮

廢瑟詞

古瑟在匣誰復識玉柱顛倒朱絲黑千年曲譜不分明
樂府無人傳正聲秋蛩暗穿塵作色腹中不辨工人名
幾時天下復古樂此瑟重奏雲門曲

花一言至
七言

夜花落早開賒對酒客興詩家能迴游騎每駐行車宛
宛清風起茸茸麗日斜且願相留懽洽惟愁虛棄光華
明年攀折知不遠對此誰能更嘆嗟

張司業集卷二

欽定四庫全書

張司業集卷三

唐 張籍 撰

五言律詩

薊北旅思

日日望鄉國空詩白紵詞長因送人處憶得別家時失意還獨語多愁祇自知客亭門外柳折盡向南枝

江南春

金公曰：此詩言
江南楊柳春日暖地無塵渡口過新雨夜來生白蘋晴
沙鳴乳燕芳樹醉遊人向晚青山下誰家祭水神

西樓望月

城西樓上月復是雪晴時寒夜共來望思鄉獨下遲幽
光落水塹淨色遍霜枝明日去千里此中還別離

別鶴

雙鶴出雲谿分飛各自迷空巢在松頂折羽落江泥尋
水終不飲逢林亦未栖別離應易老萬里兩淒淒

江陵孝女

孝女獨垂髮少年惟一身無家空托墓主祭不從人相
弔有行客起廬無舊鄰江頭聞哭處寂寞楚花春

送宮人入道

舊寵昭陽裏尋仙此最稀名初出宮籍身未稱霞衣已
別歌舞綴長隨鸞鶴飛中官看入洞空駕玉輪歸

送越客

見說孤帆去東南到會稽春雲剡溪口殘月鏡湖西水

鶴沙遶立山，纒竹裏啼謝。家曾住處，煙洞入應迷。

贈辟穀者

學得餐霞法，逢人與小還。身輕曾試鶴，力弱未離山。無食犬猶在不耕，牛自閒。朝朝空漱水，叩齒草堂間。

思江南舊遊

江皋三月時，花發石楠枝。歸客應無數，春山自不知。獨行愁道遠，回信畏家移。楊柳東西渡，茫茫欲問誰。

夜到漁家

漁家在江口潮水入柴扉
行客欲投宿主人猶未歸
竹深村路遠月出釣船稀
遙見尋沙岸春風動草衣

送邊客

揚旌過隴頭隴水向西流
塞路依山遠戍城逢笛秋
寒沙陰漫漫疲馬去悠悠
為問征行將誰封定遠侯

不食姑

何年山裡住已作綠毛身
護氣常稀語存思自見神
養龜同不食留藥任生塵
要問西王母仙中第幾人

古苑杏花

廢苑杏花在行人愁到時獨開新塹底半露舊燒枝晚
色連荒轍低陰覆折碑茫茫古陵下春盡又誰知

送流人

獨向長城北黃雲暗塞天流民屬邊將舊業作公田擁
雪添軍壘收冰當井泉知君住應老須記別鄉年

宿臨江驛

楚驛南渡口夜深來客稀月明見潮上江靜覺鷗飛旅

宿今已遠此行殊未歸離家久無信又聽搗寒衣

送蠻客

借問炎州客天南幾日行江連惡谿路山遶夜郎城柳
葉瘴雲濕桂叢蠻鳥聲知君却迴日記得早梅生

襄國別友

曉色荒城下相看秋草時獨遊無定計不欲道來期別
處去家遠愁中驅馬遲歸人渡煙水遙映野棠枝

送遠客

南原相送處秋水草還生同作憶鄉客如今分路行因
誰寄歸信漸遠問前程明日重陽節無人上古城

山中贈日南僧

獨向雙峯老松門閉兩涯翻經上蕉葉掛衲落藤花甃
石新開井穿林自種茶時逢海南客蠻語問誰家

征西將

黃沙北風起半夜又翻營戰馬雲中宿探人冰上行深
山旗未展陰磧鼓無聲幾道征西將同收碎葉城

寄友人

憶在江南日同遊三月時採茶尋遠澗鳴向春池送
客沙頭宿招僧竹裏碁如今各千里無計得相隨

送防秋將

白首征西將猶能射戟支元戎選部曲軍吏換旌旗逐
虜招降遠開邊舊壘移重收隴外地應似漢家時

律僧

苦行長不出清羸最少年持齋唯一食講律豈曾眠避

草每移徑漉虫還入泉從來天竺法到此幾人傳

答僧拄杖

靈藤為拄杖白淨色如銀得自高僧手將扶病客身春
遊不騎馬夜會亦呈人持此歸山去深宜戴角巾

靈都觀李道士

山觀雨來靜遶屋瓊草春素書天上字花洞古時人泥
竈煮靈液掃壇朝玉真幾迴遊闌苑青節亦隨身

送韋評事歸華陰

三峯西面住出見世人稀
老大誰相識恓惶又獨歸
掃窓秋菊落開簷夜蛾飛
若向雲中伴還應著褐衣

送閩僧

幾夏京城住今朝獨遠歸
脩行四分律護淨七條衣
谿寺黃橙熟沙田紫芋肥
九龍潭上路同去客應稀

送海客歸舊島

海上去應遠蠻家雲島孤
竹船來桂府山市賣魚鬚
入國自獻寶逢人多贈珠
却歸春洞口斬象祭天吳

登咸陽寺北樓

高秋原上寺下馬一登臨渭水西來直秦山南去深舊
宮人不住荒碣路難尋日暮涼風起蕭條多遠心

送從弟戴玄往蘄州

楊柳閭門路悠悠水岸斜乘舟向山寺著屐到漁家夜
月紅柑樹秋風白藕花江天詩景好迴日莫令賒

送朱慶餘及第歸越

東南歸路遠幾日到鄉中有寺山皆遍無家水不通湖

聲連葉雨野氣稻花風州縣知名久爭邀與客同

過賈島野居

青門坊外住行坐見南山此地去人遠知君終日閒蛙聲籬落草色戶庭間好是經過處唯愁暮獨還

酬韓庶子

西街幽僻處正與懶相宜尋寺獨行遠借書常送遲家貧無易事身病是閒時寂寞誰相問祇應君自知

贈姚合少府

病來辭赤縣案上有丹經為客燒茶竈教兒掃竹亭詩
成添舊卷酒盡卧空鉶闕下今遺逸誰瞻隱士星

送僧遊五臺兼謁李司空

遠去見雙節因行上五臺化樓侵曉出雪路向春開邊
寺連烽去胡兒聽法來定知巡禮後解夏始應迴

送鄭才歸寧

桂檝綵為衣行當令節歸夜潮迷浦遠畫雨見人稀野
父到時熟江鷗泊處飛離琴一奏罷山雨霑餘暉

送李評事遊越

未習風塵事初為吳越遊
露沾湖草濕日照海山秋
梅市門何在蘭亭水尚流
西陵待潮處知汝不勝愁

閑居

東城南陌塵紫幃與朱輪
盡說無多事能閑有幾人
唯教推甲子不信守庚申
誰見衡門裏終朝自在貧

寄昭應王中丞

借得西街宅開門渭水頭
長貧唯要健漸老不禁愁
獨

凭藤書案空開竹酒鉤春風石甕寺作意共君遊

酬孫洛陽

家貧相住遠齋館入時稀獨坐看書卷閒行著褐衣早
蟬庭筍老新雨徑莎肥各離爭名地無人見是非

送人任濟陰

黃綬在腰下知君非旅行將書報舊里留褐與諸生贈
別盡沽酒惜歡多出城春風濟水上候吏聽車聲

晚春過崔駙馬東園

閑園多好風不意在街東
早早詩名遠長長酒性同
竹香新雨後鶯語落花中
莫遣經過少年光漸覺空

夏日閑居

多病逢迎少閑居又一年
藥看辰日合茶過卯時煎
草長晴來地虫飛晚後天
此時幽步遠不覺到山邊

晚秋閑居

獨坐高秋晚蕭條是遠思
家貧常畏客身老轉憐兒
萬種盡閑事一生能幾時
從來疎懶性應祇有僧知

和陸司業習靜寄所知

幽室獨焚香
清晨下未央
山開登竹閣
僧到出茶堂
收拾新琴譜
尋封舊藥方
逍遙無別事
不似在班行

酬韓祭酒雨中見寄

雨中愁不出
陰黑盡連宵
屋濕唯添漏
泥深未放潮
無
鵲憐馬瘦
少食信兒嬌
聞道韓夫子
還同此寂寥

和裴僕射移官言志

身在勤勞地
常思放曠時
功成歸聖主
位重委羣司
看

豐臺邊石閑吟篋裏詩蒼生正瞻望難與故山期

酬白二十二舍人早春曲江見招

曲江冰欲盡風日已恬和柳色看猶淺泉聲覺漸多紫
蒲生濕岸青鴨戲新波仙掖高情客相招共一過

和周贇善聞子規

秦城啼楚鳥遠思更紛紛况是街西夜偏當雨裏聞應
投最高樹似隔數層雲此處誰能聽遙知獨有君

送李騎曹靈州歸覲

翩翩出上京幾日到邊城漸覺風沙起還將弓箭行席箕侵路暗野馬見人驚軍府知歸慶應教數騎迎

寒食夜寄姚侍御

貧官多寂寞不異野人居作酒和山藥教兒寫道書五湖歸去遠百事病來疎況憶同懷者寒庭月上初

題清徹上人院

古寺臨壇久松間別起堂看添浴佛水自合讀經香愛養無家客多傳得效方遇齋長不出坐卧一繩牀

和裴司空即事通簡舊僚

肅肅上台坐四方皆仰風
當朝奉明政早日立元功
獨對赤墀下密宣黃閣中
猶聞動高韻思與舊僚同

使回留別襄陽李司空

江亭寒日晚絃筦有離聲
從此一筵別獨為千里行
遲遲戀恩德役役限公程
迴首吟新句霜雲滿楚城

經王處士原居

舊宅誰相近唯僧近竹
關庭開雲滿井窓曉雪通
山來

客半留宿借書多寄還明時未中歲莫便一生閑

不食仙姑山居

寂寂花枝裏草堂唯素琴因山曾改姓見客不言心
月出溪路靜鶴鳴雲樹深丹砂如可學便欲住幽林

江頭

晚步隨江遠來帆過眼頻試尋新住客少見故鄉人
回首憐歸翼長吟任此身應同南浦鴈更見嶺頭春

寄孫冲主簿公

低折滄洲簿無書整兩春馬從同事借妻怕罷官貧道
僻收閒藥詩高笑古人仍聞長吏奏表乞鎖廳頻

贈任懶

未肯求科第深坊且隱居勝遊尋野客高卧看兵書點
藥醫閑馬分泉濯遠蔬漢庭無得意誰擬薦相如

舊宮人

歌舞梁州女歸時白髮生全家沒蕃地無處問鄉程宮
錦不傳樣御香空記名一身難自遂愁逐路人行

春日留別

遊人欲別離
醉後對花枝
看却春將晚
莫輕年少時
臨行記分處
回首更相思
各向天涯去
重來未有期

沒蕃故人

前年伐月支
城上沒全師
蕃漢斷消息
死生長別離
無人收廢帳
歸馬識殘旗
欲祭疑君在
天涯哭此時

望行人

秋風窻下起
旅鴈向南飛
日出門望家
家行客歸無

因見邊使空待寄寒衣獨倚青樓暮烟深鳥雀稀

宿江店

野店臨西浦門前有橘花停燈待賈客賣酒與漁家夜
靜秋江白路迴山月斜開尋泊船處潮落見平沙

薊北春懷

渺渺水雲外別來音信稀因逢過江使却寄在家衣問
路更愁遠逢人空說歸今朝薊城北又見塞鴻飛

雪溪西亭晚望

雪水碧悠悠西亭柳岸頭夕陰生遠岫斜照逐迴流此地動歸思逢人方倦遊吳興耆舊盡空見白蘋洲

冬夕

寒蛩獨罷織相續鴈猶鳴月色平窓入鄉心半夜生不成高枕夢復作遶堦行回首嗟淹泊城頭北斗橫

山中秋夜

寂寂山景靜幽人歸卧遲移琴當月下漉酒對花時新露冷莎席暗泉衝竹籬西峯採藥伴此夕恨無期

聽夜泉

細泉深處落夜久漸聞聲獨起出門聽欲尋當澗行還
疑隔林遠復畏有風生月下堪留此無人共到明

夜宿黑竈溪

夜到碧溪裏無人秋月明逢幽更移宿取伴亦探行花
下紅泉色雲西乳鶴聲明朝記歸處石上自書名

贈同谿客

幽居得相近煙景每寥寥共伐臨谿樹同為過水橋自

教青鶴舞分採紫芝苗更愛南峯住尋君路恐遙

出塞

秋塞雪初下將軍遠出師分營長記大放馬不收旗月
冷邊帷濕沙昏夜探遲征人皆白首誰見凱歌時

嶺外逢故人

過嶺萬餘里旅遊經此稀相逢去家遠共說幾時歸海
上見花發瘴中唯鳥飛炎州望鄉伴自識北人衣

送閑師歸江南

偏住江南寺隨緣到上京多生脩律業外學得詩名講
殿偏追入齋家別請行青楓鄉路遠幾日盡歸程

贈箕山僧

久住空林下長齋耳目清蒲團借客坐石甃憚人行似
鶴難知性因山強號名時間衣袖裏閣招念珠聲

送徐先生歸蜀

日暮遠歸處雲間仙觀鐘唯持青玉牒獨立碧雞峯陰
洞新生乳寒泉舊養龍幾時因賣藥得向海邊逢

寄紫閣隱者

紫閣氣沉沉先生住處深有人時得見無路可相尋
野鹿伴茅屋秋猿守栗林唯應採靈藥更不別營心

贈隱者

先生已得道市井亦容身救病自行藥得錢多與人問
年常不定傳法又非真每見鄰翁說時時使鬼神

登城寄王秘書

聞君住鶴嶺西望自依依遠客偏相憶登城獨不歸十

年為道侶幾處共柴扉今日煙霞外人間得見稀

舟行寄李湖州

客愁無次第川路重辛勤
蒨窰行舟澁灣多轉櫂頻薄
遊空感惠失計自憐貧
賴誦汀洲句時時慰遠人

送南客

行路雨脩脩青山盡海頭
天涯人去遠嶺北水空流
夜市連銅柱巢居屬象州
來時舊相識誰向日南遊

送友人歸山

出山成白首重去結茅廬移石修廢井掃龕盛舊書開
田留古樹分洞與僧居長在幽峯裏樵人見亦稀

留別江陵王少府

迢迢山上路病客獨行遲況此分襟日當君失意時寒
林露遠驛晚燒獵荒陂別後空回首相逢未有期

郢州贈別王七使君

昔是詞狂客今為酒病夫強吟翻悵惘從醉不歡娛身
世久成幻交親一半無郢城君莫厭猶較近京都

送新羅使

萬里為朝使離家今幾年應知舊行路却上遠歸船夜泊避蛟窟朝炊求島泉悠悠到鄉國還望海西天

題山中古祠

春草空祠暮荒林鳥雀飛紀年碑石在經亂祭人稀野鼠緣朱帳陰塵蓋畫衣近聞潭水黑時見宿龍歸

古樹

古樹枝柯少枯來復幾春露根堪繫馬空腹定藏人蠹

節每苔老燒痕霹靂新若當江浦上行客祭為神

漁陽將

塞深沙草白都護領燕兵放火燒奚帳分旗築漢城下
營看嶺勢尋雪覺人行更向桑乾北擒王問磧名

送南遷客

去去遠遷客瘴中哀病身青山無限路白首不歸人海
國戰騎象蠻州市用銀一家分幾處誰見日南春

和左司元郎中秋居十首

選得閒坊佳秋來樹木肥風前捲菌簾雨後脫荷衣野
客留方去山童取藥歸非因入朝省過此出門稀

又

有地唯栽竹無池亦養鷺學書求墨跡釀酒愛朝和古
鏡銘文淺神方謎語多居貧閒自樂豪客莫相過

又

閒來松菊地未省有埃塵直去多將藥朝回不訪人見
僧收酒器迎客換紗巾更恐登清要難成自在身

又

自知清靜好不要問時豪就石安琴枕穿松厭酒槽山
情因月甚詩語入秋高身外無餘事唯應筆硯勞

又

閒堂新掃洒稱是早秋天書客多呈帖琴僧與合絃莎
臺乘晚上竹院就涼眠終日無忙事還應似得仙

又

醉倚斑藤杖閒眠癭木牀案頭行氣訣爐裏降真香尚

儉經營少居閒意思長秋茶莫夜飲新自作松漿

又

每憶舊山居新教上墨圖晚花迴地種好酒問人沽夜
後開朝簿申前發省符為郎凡幾歲已見白髭鬚

又

菊地纔通屐茶房不壘階憑醫看蜀藥寄信覓吳鞋盡
得仙家法多隨道客齋本無榮辱意不是覺安排

又

金匱月令
卷三
林下無拘束閒吟放性靈好時閒藥竈高處置琴亭更
選居山記唯尋相鶴經初當授衣假無吏換門鈴

又

客散高齋晚東園景象偏晴明猶有蝶涼冷漸無蟬藤
折霜來子蝸行雨後涎新詩纔上卷已得滿城傳

思遠人

野橋春水清橋上送君行去去人應老年年草自生出
門看遠道無信向邊城楊柳別離處秋蟬今復鳴

哭山中友人

入雲遙使哭山友隔今生遶墓招魂魄鵲巖記姓名犬
因無主瘠鶴為見人鳴長說能尸解多應別路行

宿廣德寺寄從舅

古寺客堂空開簾四面風移牀動栖鵲停燭聚飛虫閑
卧逐涼處遠愁生靜中林西微月色思與甯家同

宿邯鄲館寄馬磁州

孤客到空館夜寒愁卧遲雖沽主人酒不似在家時幾

宿得歡笑如今成別離明朝行更遠迴望隔山陂

遊襄陽山寺

秋色江邊路煙霞若有期寺貧無利施僧老足慈悲薜
荔侵禪窟蝦蟆占浴池閑遊殊未徧卽是下山時

酬裴僕射朝迴寄韓吏部

獨愛南關裏山晴竹杪風從容朝早退瀟灑客常通案
曲新亭上移花遠寺中唯應有吏部詩酒每相同

和李僕射秋日病中作

由來病根淺易見藥功成曉日杵臼靜涼風衣服輕猶
疑多氣力漸覺有心情獨倚紅藤杖時時堦上行

早春病中

羸病及年初心情不自如多申請假牒祇送賀官書幽
徑獨行步白頭長懶梳更憐晴日色漸漸暖貧居

送嚴大夫之桂州

旌旆過湘潭幽竒得徧探涉城百越北行路九疑南有
地多生桂無時不養蠶聽訶難辨曲風俗自相諳

詠懷

老去多悲事非唯見二毛
眼昏書字大耳重覺聲高
望月偏增思尋山易發勞
都無作官意賴得在閑曹

使至藍谿驛寄太常王丞

獨上七盤去峯巒轉轉稠
雲中迷象鼻雨裏下箏頭
水沒荒橋路鴉啼古驛樓
君今在城闕肯見此中秋

贈海東僧

別家行萬里自說過扶餘
得學中州語能為外國書
與

醫收海漆持咒取龍魚更問同來伴天台幾處居

寄漢陽故人

知君漢陽住煙樹遠重重歸使雨中發寄書燈下封同
時買江塢今日別雲松欲問新移處青蘿最北峯

送西安將

萬里海西路茫茫邊草秋計程沙塞口望伴驛峯頭雪
暗非時宿沙深獨去愁塞鄉人易老莫住近番州

題李山人幽居

襄陽南郭外茅屋一書生無事焚香坐有時尋竹行行畫
苔藤杖細踏石笋鞋輕應笑風塵客區區逐世名

早春閑遊

年長身多病獨宜作冷官從來閑坐慣漸覺出門難樹
影新猶薄池光晚尚寒遙聞有花發騎馬暫行看

贈太常王建藤杖笋鞋

蠻藤剪為杖楚笋結成鞋稱與詩人用堪隨禮寺齋尋
花入幽徑步月下寒堦以此持相贈君應愜素懷

和戶部令狐尚書喜裴司空見招看雪

南園新覆雪上宰曉來看誰共登春榭唯聞有地官色
連山遠靜氣與竹偏寒高韻更相應寧同歌吹歡

春日李舍人宅見兩省諸公唱和因書情即事

又見帝城裏東風天氣和官閑人事少年長道情多紫
掖發章句青闌更詠歌誰知常寂寞終日斷經過

和裴司空以詩請刑部白侍郎雙鶴

皎皎仙家鶴遠留閑宅中徘徊幽榭月嘹唳小亭風丞

相西園好池塘夜水通欲將來放此賞望與賓同

同錦州胡郎中清明日對雨西亭宴

郡內開新火高齋雨氣清惜花邀客賞勸酒促歌聲共
醉移芳席留歡閉暮城政閒方宴語琴筑任遙情

莊陵挽歌詞三首

白日已昭昭干戈亦漸消迎師新出道從諫早臨朝倭
倖威權薄忠良寵錫饒莊陵今一變無復白雲謠

又

觀風欲巡洛習戰日開池始改三年政旋聞七月期陵
分内外使官具吉凶儀渭北新園路簫笳遠更悲

又

曉日龍車動秋風間闔開行帷六宮出執紼萬方來慘
慘郊原暮遲遲挽唱哀空山煙雨夕新栢遶陵臺

水

蕩漾空沙際虛明入遠天秋光照不極鳥色去無邊勢
引長雲濶波輕片雪連江洲杳難測萬古覆蒼烟

送安法師

出郭見落日別君臨古津
遠程無野寺宿處問何人
原色不分路錫聲遙隔塵
山陰是家節猶及蕙蘭春

寄靈一上人初歸雲門寺

寒山白雲裏法侶自招攜
竹逕通城下松門隔水西
方同沃洲去不作武陵迷
彷彿通仙處秋風是會稽

夏日閒居

無事門多閉偏知夏日長
早蟬聲寂寞新竹氣清涼
閒

對臨書案看移晷藥牀自憐歸未得猶寄在班行

老將

鬢衰頭似雪行步急如風不怕騎生馬猶能挽硬弓
兵書封錦字手詔滿香筒今日身憔悴猶誇定遠功

欽定四庫全書

張司業集
卷三

張司業集卷三